



Tužilaštvo - Tužiteljstvo Bosne i Hercegovine
Тужилаштво Босне и Херцеговине

Broj: T20 0 KTA 0022129 22
Sarajevo, 15.08.2024. godine

Na osnovu člana 35. stav 2. tačka e) i člana 216. stav 3. ZKP-u BiH donosim sljedeću:

NAREDBU
o nesprovođenju istrage

Neće se provoditi istraga po prijavi [REDACTED] naslovljenoj kao „Izveštaj o sumnji na izvršenje krivičnog djela“ [REDACTED], kao ni identičnom aktu dostavljenom i putem službenog e-maila Tužilaštva BiH [REDACTED], jer iz prijave i pratećih spisa ne proizilazi osnov sumnje da je izvršeno krivično djelo propisano KZ BiH, niti bilo koje drugo krivično djelo.

Obrazloženje

Dana [REDACTED] Tužilaštvo BiH zaprimilo je putem pošte i putem službenog e-maila dvije krivične prijave [REDACTED], identičnog sadržaja, naslovljene kao „Izveštaj o sumnji na izvršenje krivičnog djela“ sa priložene tri fotografije u crno-bijeloj boji.

Navedenu prijavu [REDACTED] podnosi u ime naroda i građana BiH nepravoslavnog vjerskog opredjeljenja protiv članova [REDACTED], odgovornih lica [REDACTED] zbog sumnje da su izvršili krivično djelo Izazivanje nacionalne, rasne i vjerske mržnje, razdora i netrpeljivosti iz člana 145a. KZBiH.

U prijavi ističe kako su se dana [REDACTED] prilikom održavanja [REDACTED] godišnjice [REDACTED] na službenom vozilu [REDACTED] nalazila vjerska obilježja, te dostavio tri fotografije u crno-bijeloj boji, pozivajući se na član 14. stavove 1. i 2. Zakona o slobodi vjere i pravnom položaju crkava i vjerskih zajednica BiH koji zabranjuje privilegovanje ijedne crkve ili vjerske organizacije u odnosu na ostale, te člana 5. stav 1. istog Zakona kojim se zabranjuje diskriminacija u vjeri. Smatra kako je s obzirom na korištenje vjerskih simbola na vozilu [REDACTED] evidentno postojala namjera unošenja nemira prema građanima nepravoslavne vjeroispovijesti u RS, a što rezultira raspirivanju vjerskog razdora, mržnje i netrpeljivosti među konstitutivnim narodima. Predložio je da se preduzmu provjere i radnje u cilju utvrđivanja osnovanosti navoda iz prijave i odluči o pokretanju krivičnog postupka.

Tužilaštvo BiH izvršilo je potrebne provjere, te je od [REDACTED] dobilo informaciju da su se u početnom periodu, neposredno nakon nabavke vozila „[REDACTED]“ za potrebe [REDACTED] na istim nekoliko puta tokom promotivnih ceremonija nalazili privremeni magneti sa likovima pravoslavnih svetaca i da su isti skinuti sa vozila, tako da se od prije godinu dana na službenim vozilima [REDACTED] ne nalaze vjerska obilježja.

Član 2. Stav 1. Zakona o slobodi vjere i pravnom položaju crkava i vjerskih zajednica u BiH definiše diskriminaciju zasnovanu na vjeri ili uvjerenju, koja označava svako isključivanje, ograničavanje, davanje prednosti, izostavljanje ili svako drugo razlikovanje koje je zasnovano na religiji ili uvjerenju, a koje ima za cilj ili se njime može postići - direktno ili indirektno, namjerno ili nenamjerno ukidanje ili umanjivanje priznanja, jednakog uživanja i ostvarivanja ljudskih prava i osnovnih sloboda u građanskim, političkim, ekonomskim, socijalnim i kulturnim stvarima.

Član 5. Zakona o slobodi vjere i pravnom položaju crkava i vjerskih zajednica u BiH predviđa zabranu diskriminacije na vjeri ili uvjerenju na način kako je definisana u članu 2. stav 1. istog Zakona, a u smislu preduzimanjaem aktivnosti i djela usmjerenih na raspirivanje vjerske mržnje protiv bilo koje crkve ili vjerske zajednice ili njenih članova, omalovažavanja ili izrugivanja bilo koje vjere, kao i izazivanja, podržavanja ili pozivanja vjerske netrpeljivosti i mržnje.

Članom 2. stav 1. Zakona o zabrani diskriminacije BiH propisano je da diskriminacija predstavlja svako različito postupanje uključujući svako isključivanje, ograničavanje ili davanje prednosti utemeljeno na stvarnim ili pretpostavljenim osnovama prema bilo kojem licu ili grupi lica i onima koji su s njima u rodbinskoj ili drugoj vezi na osnovu njihove rase, boje kože, jezika, vjere, etničke pripadnosti, te drugim diskriminatornim osnovama, kao i svaka druga okolnost koja ima za svrhu ili posljedicu da bilo kojem licu onemogući ili ugrožava priznavanje, uživanje ili ostvarivanje na ravnopravnoj osnovi, prava i sloboda u svim oblastima života.

Član 3. stav 1. Zakona o zabrani diskriminacije propisuje oblike diskriminacije, posrednu i neposrednu diskriminaciju, pri čemu oba ova oblika za rezultat imaju da je neko lice ili grupa lica dovedena ili je bila ili bi mogla biti dovedena u nepovoljniji položaj od nekog drugog lica ili grupe lica u sličnim situacijama.

Član 145a. KZ BiH previđa kazne za onoga ko javno izaziva ili raspiruje nacionalnu, rasnu ili vjersku mržnju, razdor ili netrpeljivost među konstitutivnim narodima i ostalima, kao i drugima koji žive ili borave u Bosni i Hercegovini, te onog ko javno podstrekne na nasilje ili mržnju usmjerenu protiv grupe osoba ili člana grupe određene s obzirom na rasu, boju kože, vjeroispovijest, porijeklo ili nacionalnu ili etničku pripadnost itd.

Naime, evidentno je da na vozilima [REDAKCIJA] jesu isticana određena vjerska obilježja za potrebe svečanosti povodom održavanja [REDAKCIJA], a kojoj su prisustvovali članovi te jedinice, te da su ista uklonjena i nakon spornog događaja više se ne koriste. Međutim u navedenim radnjama nisu se stekla obilježja krivičnog djela izazivanje nacionalne, rasne i vjerske mržnje, razdora i netrpeljivosti iz KZ BiH jer nedostaje elementat javnog izazivanja ili raspirivanja u konkretnom slučaju vjerske mržnje ili pak podstrekivanja nasilja ili mržnje po osnovu vjere.

Nije bilo aktivnosti u smislu člana 5. Zakona o slobodi vjere i pravnom položaju crkava i vjerskih zajednica u BiH u vidu uvredljivih sadržaja kojima se izražava, zagovara ili podstiče mržnja ili nasilje, a koja je usmjerena kao određenoj ciljanoj grupi.

Imajući u vidu navedeno, u smislu člana 216. stav 3. KZ BiH donijeta je odluka kao u dispozitivu ove Naredbe.

Podnosilac prijave ima pravo podnošenja pritužbe Kabinetu Glavnog tužioca u roku od osam (8) dana.

**TUŽILAC
TUŽILAŠTVA BiH**